

立齋外科心法卷之四

疝瘡

附玉莖腫及挺縮及出白精

薛已

新編

一老人患疝小便淋瀝脈細體倦此氣虛兼濕熱也
用清心蓮子飲及補中益氣湯治之而愈又一弱人
撈中作痛小便淋瀝此因火燥下焦無血氣不能降
而滲泄之令不行用四物湯加黃柏知母茯苓牛膝
木通十餘貼痛止便利先君氣短撈中若瘡小便不
通製四物湯加參芪煎吞滋腎丸而愈蓋前證以虛
為本以病為末益其本則末自去設若不固元氣專

攻其病害滋深矣

王錦衣年踰四十素有淋患疝瘡焮痛倦怠用小柴胡湯加黃連黃柏青皮當歸而愈

杜舉人名京年踰三十陰囊濕痒莖出白物如膿舉則急痛此肝疝也用龍膽瀉肝湯而愈有陰莖腫或縮或挺或痒亦以此藥治之

王上舍遺精勞苦愈盛榜中結核服清心蓮子飲連翹消毒散不應予以八環湯加山藥山茱萸遠志十餘劑漸愈更以茯苓丸治之遂不復作葉巡檢患此云諸藥不應盧丹谷與八味丸治之而愈

杖瘡

文刑部用晦伏 闕諫南巡受杖瘀血已散壞肉不潰用托裏之藥稍潰而膿清此血氣虛也非大劑參芪不能補文君亦善醫以爲恐腹滿予強之飲食稍思遂加大補劑飲食日進肉潰膿稠而愈嘗治江翰林姚王鄭三吏部李陳姜三禮部南吳二刑部皆與文同事者先散其瘀血漸用排膿托裏之藥俱愈夫叫號則傷氣痛則傷血此氣血之虛明矣况脾主肌肉脾氣受傷飲食必減血一水則肌肉不旺故必理脾胃健肉自生若非參朮歸耆之類培養脾土則肌

肉何由而生然又須分病人虛實及有無瘀血停積
蓋打撲墜墮皮肉不破肚腹作痛者必有瘀血在內
宜以復元活血湯攻之老弱者四物湯加紅花桃仁
川山甲補而行之若血去多而煩燥此血虛也名曰
亡血以獨參湯補之有打撲墜墮稍輕別無瘀血等
症但是疼痛不止者惟和血氣調經脈其痛自止更
以養氣血健脾胃無有不效亦有痛傷胃氣作嘔或
不飲食者以四君子湯加藿香砂仁當歸治之若有
瘀血不先消散而加補劑則成實實之禍設無瘀血
而妄行攻利則致虛虛之禍予壬辰年公事居庸關

見覆車被傷者七人仆地呻吟一人未蘇予俱令以
熱童便灌之皆得無事予于壬申年被重車碾傷悶
瞽良久復蘇曾滿如築氣息不通隨飲熱童便一碗
胸寬氣利惟小腹作痛吾鄉徐銀臺東濠先生與復
元活血湯一劑便血數升許痛腫悉退更服養血氣
藥而痊大凡傷損不問壯弱及有無瘀血停積俱宜
服熱童便以酒佐之推陳致新其功甚大若脇脹或
作痛或發熱煩燥口乾喜冷惟飲熱童便一甌勝服
他藥他藥雖亦可取效但有無瘀血恐不能盡識反
致悞人惟童便不動臟腑不傷氣血萬無一失嘗詢

外科心法卷四
三
諸營操軍常有墜馬傷者何以愈之俱對曰惟服熱
童便即愈此其屢試之驗亦明矣又凡腫痛或傷損
者以葱搗爛熱罨之尤妙

夏鳳北京人因杖瘡臀膝通潰膿瘀未出時發昏憤
此膿毒內作而然也急與開之昏憤愈盛此虛也以
八瓊湯一服少可數服死肉自腐頓取之令用猪蹄
湯洗淨以神效當歸膏塗貼再以十全大補湯兩月
而愈若更投破血之劑則危矣大抵杖瘡一症皆瘀
血為患宜速治療淺者砭之深者針之更以活血流
氣藥和之內潰者開之有腐肉取之以壯胃生血藥

托之可保無虞有傷筋骨而作痛者以沒藥降聖丹
治之若牙關緊急或腰背反張者以玉真散治之並
效

火瘡

馮氏子患火瘡驟用涼藥敷貼更加腹脹不食予以
人參敗毒散加木通山梔治之外以栢葉炒為末麻
油調搽漸愈嘗用煮犬汁上浮脂調銀硃塗之更效
若用涼藥逼火毒入內多致不救

虫犬傷

附破傷風

陳鑑居庸關人蝎螫手疼痛徹心頃刻焮痛至肢寒

熱拘急頭痛惡心此邪正二氣相搏而然以飛龍奪命丹塗患處及服止痛之藥俱不應乃以隔蒜灸法灸之遂愈子母及子皆嘗被螫如前灸之痛即止子母又嘗為蜈蚣傷指亦用前法而愈凡蛇毒之類所傷依此療之並效本草謂蒜療瘡毒有回生之功一獵戶腿被狼咬痛甚治以乳香定痛散不應予思至陰之下氣血凝結藥力難達令隔蒜灸至五十餘壯疼痛悉去仍以托裏藥及膏藥貼之而愈又王生被鬪犬傷腿頃間焮痛至股翌日牙關緊急以玉真散治之不應亦隔蒜灸三十餘壯而蘇仍以玉真散

及托裏消毒藥而愈一人誤傷去小指一節牙關緊急腰背反張人事不知用玉真散青州白丸子各一服未應此亦藥力不能及也急用蒜搗爛裹患指以艾灸之良久覺痛仍以白丸子一服及托裏散數服而愈夫積在腸胃尚為難療况四肢受患風邪所襲遏絕經絡者古人所製淋潰貼熒鎌刺等法正為通經絡導引氣血也

一男子墜馬傷頭并臂令葱搗爛炒熱罨患處以熱手熨之服沒藥降聖丹而愈本草云葱大治傷損

腹痛

楊錦衣子十歲腹脹痛服消導藥不應彼以爲毒請
診其脉右關沉伏此食積也河間云食入即吐胃脘
痛更兼身體痛難移腹脹善噫舌本強得後與氣快
然衰皆脾病也審之果因食粽得此以白酒麴熱酒
服而愈

黃恭人腹內一塊不時作痛痛則人事不知良久方
蘇諸藥不應診其脉沉細則非瘡毒劉河間云失笑
散治疝氣及婦人血氣痛欲死並效與一服痛去六
七再服而平此藥治產後心腹絞痛及兒枕痛尤妙

誤吞水蛭

一男子患腹痛食熱則痛甚諸藥不應半年後腹加
腫脹面色痿黃診其脉不洪滑非癰也詢之云始於
渴甚俯飲澗水予意其誤吞水蛭而然令取河泥爲
丸空心用水送下百丸果下蛭而愈又一子因跌溝
中腹作痛服積驚等藥不應亦依前症療之而愈

蟲入耳

先君嘗睡間有蟲入耳痛脅將生姜擦猫鼻其尿自
出取尿滴耳內蟲即出而愈又有百戶張錦謂予曰
耳内生瘡不時作痛痛而欲死痛止如故診其脉皆
安靜予謂非瘡也話間痛忽作予度其有虫入耳令

回急取猫尿滴耳果出一臭虫遂不復痛或用麻油
滴之則虫死難出或用炒芝蔴枕之則虫亦出但俱
不及猫尿之速也

治諸虫傷白礬一塊於端午日自早晒至晚收貯用
時旋為末水調搽患處痛即止

小兒

丹瘤 粘瘡

瘡毒 癰疹

瘡疥 癩瘡

結核 癩疽

黃水瘡 痘毒

腦疳

肺疽

腎瘡

無辜疳毒

吳刑部靜之子甫周歲患丹毒延及遍身如血染予
用磁鋒擊刺遍身出黑血以神功散塗之查春田用
大連翹飲而愈王國戚子未彌月陰囊患此如前治

之而愈金氏子不欲刺毒入腹而死河間云丹從四
肢起入腹者不治予嘗刺毒未入腹者無不效

一三歲小兒臂患毒炊痛服解毒丸及搽神功散而
消嘗治便秘或煩燥服五福化毒丹亦效若膿成者
急刺去用紙撚蘸麻油經瘡內以膏藥貼之若兒安
靜不必服藥候有膿取去仍用紙貼有小兒瘡毒不
愈或愈而復發皆因母食炙煨辛辣或有熱症宜先
治母熱就於母藥中加漏蘆煎服兒瘡亦愈若小兒
自患前症不能飲藥者將藥加漏蘆令母服之其瘡
亦愈

外科心法卷之四
一 小兒臂患痘毒不寧按之復起此膿脹痛而然也
遂刺之以托裏而愈有痘後肢節作腫而色不赤飲
以金銀花散更以生黃豆末熱水調傳乾以水潤之
自消若傳六七日不消膿已成急刺之宜服托裏藥
一周歲小兒先於頭患瘡疥漸至遍身久而不愈飲
四物湯加防風黃芩升麻外搽解毒散月餘而愈
有七歲小兒頸結二核時發寒熱日久不愈以連翹
丸治之而消若患在面臂等處尤當用此藥若潰而
不斂宜服托裏之劑
一 小兒頭面患瘡數枚作痒出水水到處皆潰成瘡

名曰黃水瘡也用菘豆粉松香爲末香油調傳飲以
荆防敗毒散而愈

一 小兒頭面生瘡數枚作痒瘡痂積累名曰粘瘡也
以枯白礬黃丹末等分麻油調搽更飲敗毒散而愈
一 小兒癩疹瘙痒發熱不安以消風散治之又一小
兒亦患此咳嗽時嘔以葛根橘皮湯並愈

一 小兒頸面胸腹患水泡數枚潰而成瘡此風邪乘
於皮膚而然也名曰癩瘡飲荆防敗毒散更以牛糞
燒存性爲末傳之而愈有癩疽一症爲患最毒形如
粟許大者如粟患無常處多在手指潰而出血用南

星半夏白芷末傅之重者見骨或狂言煩悶

一小兒痘瘡已愈腿上數枚變疔蝕陷用雄黃銅綠等分爲末傅搽兼金銀花散數服而愈若患遍身用出蛾綿蛋將白礬爲末填蛋內燒礬候汁乾取出爲末放地上以碗蓋良久出火毒傅之效

一小兒痘後瘙癢搔破成瘡膿水淋漓予用經霜陳茅草爲末傅搽及鋪蓆上兼飲金銀花散而愈若用菘豆滑石末傅之亦可但不及茅草之功爲速耳

一小兒頭患白瘡皮光且急諸藥不應名曰腦疔瘡乃胎毒挾風熱而成也服以龍膽丸及吹蘆薈末於

鼻內兼搽解毒散而愈若重者髮結如穗腦熱如火遍身出汗腮腫胞高尤當服此藥

一小兒咳嗽喘逆壯熱惡寒皮膚如粟鼻痒流涕咽喉不利頤爛吐紅氣脹毛焦作利名曰肺疔以地黃清肺飲及化匿丸治之而愈

一小兒眉皺多啼嘔吐清沫腹中作痛肚脹筋青唇口紫黑肛門作痒名曰蛔疔以大蘆薈丸治之而愈有蟲食脊脊身熱黃瘦煩溫下痢拍背如鼓鳴脊骨如鋸齒十指生瘡常啮此脊疔也當以前丸治之
一小兒鼻外生瘡不時揉擦延及兩耳諸藥不效以

盧薈丸服及搽松香菜豆末而愈

一小兒十歲患瘡疥久不愈肌體羸瘦寒熱作時腦熱足冷滑瀉肚痛齟爛口臭乾渴瓜黑面鰲此腎疳也服六味地黄丸更搽解毒散而愈

一小兒項結一核堅硬如癭面色痿黃飲食不甘服托裏藥不應此無辜疳毒也予以蟾蜍丸治之而愈若數服而不消按之轉動軟而不痛者內有蟲如粉宜急針去之若不速去則蟲隨氣走內蝕臟腑不治丸用蟾蜍一二枚夏月溝渠中取腹大不跳不鳴者先取蜚蛆一杓置桶中以尿浸之桶近上令乾使蛆

不得出却將蟾蜍撲死投在蛆中任與蛆食一晝夜次以新布袋包繫定置水急處浸一宿取出瓦上焙為末入麝香五分軟飯丸如麻子大每服二三十丸空心米飲送下

槐花酒治驗

滁州于侍御髀髀患毒痛甚服消毒藥其勢未減即以槐花酒一服勢隨大退再以托裏消毒之藥而愈王通府患發背十餘日勢危脉大先以槐花酒二服殺其勢退更以敗毒散二劑再以托裏藥數劑漸潰又用桑柴燃灸患處每日灸良久仍以膏藥貼之灸

至數次膿潰腐脫以托裏藥加白朮陳皮月餘而愈
劉太尹發背六七日滿背腫痛勢甚危與隔蒜灸百
壯飲槐花酒二碗即睡覺以托裏消毒藥十去五六
令將棗燃灸患處而潰數日而愈大抵腫毒非用蒜
灸槐花酒先去其勢雖用托裏諸藥其效未必甚速
一男子患腦疽已十餘日面目腫閉頭焮如斗脉洪
數煩燥飲冷此膀胱濕熱所致以黃連消毒飲二劑
次以槐花酒二碗頓退以指按下腫即復起此膿已
成於頸額肩頰各刺一孔膿並湧出口日始開更以
托裏藥加金銀花連翹三十餘劑而愈

一上舍肩患疽脉數以槐花酒一服勢頓退再與金
銀花黃耆甘草十餘服而平槐花治濕熱之功最為
神速若胃寒之人不可過劑

金銀花治驗

一園丁患發背甚危令取金銀藤五六兩搗爛入熱
酒一鐘絞取汁酒溫服相繼患處四五服而平彼用
此藥治瘡足以養身成家遂棄園業諸書云金銀花
治瘡瘍未成者即散已成者即潰有回生之功

一男子患腦疽勢劇脉實以黃連消毒散治之不應
以金銀藤二兩水二鐘煎一鐘入酒半碗服之勢去

三四再服漸退又加黃栢知母括萎當歸甘草節數劑而潰止加黃耆川芎白芷桔梗數劑而愈

一男子患腦疽其頭數多痛不可忍先服消毒藥不應更以金銀花服之即酣睡覺而勢去六七再四劑而消又一男子所患尤甚亦令服之腫痛頓退但不能平加以黃耆當歸瓜蒌仁白芷甘草節桔梗數劑而愈

一男子被鬼擊身有青痕作痛以金銀花煎湯飲之即愈本草謂此藥大治五種飛尸此其驗也

忍冬酒治癰疽發背初發時便當服此不問疽發何處或婦人乳癰皆有奇效如或處鄉落貧家服此亦能取效仍兼以麥飯石膏及神異膏貼之甚效

忍冬藤即金銀花生取藤葉一把入砂器內爛研入白酒少許調和稀稠得宜塗傅四圍中心留一口洩其毒氣其藤只用五兩用木槌槌碎生甘草節一兩右二味入砂瓶內以水二盃用文武火煎至一盃入無灰酒一盃再煎十數沸去粗分爲三次溫服粗敷患處一日夜喫盡如病勢重一日夜要飲兩劑服至大小便通利則藥力到沈內翰云如無生者用乾者終不及生者力大而効速此藤凌寒不凋故名忍冬

草其藤左繞故又名左纏藤附樹延蔓或在園圃墻垣之上藤方而紫葉似薜荔而青二月開花微香蒂帶黃色花初開則色白經一二日則色黃故又名金銀花又名鷺鷥藤又名金釵股又名老翁鬚在處有之而本草中不言善治癰疽發背而近代名人用之奇效方書所載療癰疽發背皆以爲要藥

鍼法總論

嘗觀上古有砭石之制內經有九針之別制雖不同而去病之意一也且瘡瘍一科用針爲貴用之之際雖云量其潰之淺深尤當隨其肉之厚薄若皮薄針

深則反傷良肉益增其潰肉厚針淺則膿毒不出反益其痛用針者可不慎哉至於附骨疽氣毒流注及有經久不消內潰不痛宜燔針開之若治咽喉之患當用三稜針若丹瘤及癰毒四畔赤焮疼痛如灼宜砭石砭之去血以泄其毒重者減輕者消如洪氏室患腹癰膿脹悶脅以針刺之膿出即蘇一人患囊癰膿孰腫脹小便不利幾殆急針之膿水大泄氣通而愈大抵用針之法迎而奪之順而取之所謂不治已病而治未病不治已成而治未成正此意也今之患者或畏針而不用醫者又徇患者之意而不針遂

外科心法卷四
致膿已成而不得潰或得潰而所傷已深矣卒之夭
枉者十常八九亦可悲夫

灸法總論

夫瘡瘍之症有諸中必形諸外在外者引而拔之在
內者踈而下之灼艾之功甚大若毒氣鬱結瘀血凝
滯輕者或可藥散重者藥無全功矣河間云痛者灸
至不痛不痛者灸至痛毒氣自然隨火而散東垣云
若不針烙則毒氣無從而解膿瘀無從而泄過時不
烙反攻於內陳氏云譬如盜入人家必開戶以逐之
是故善治毒者必用隔蒜灸舍是而用寒苦之劑其

壯實內有火者或可彼怯弱氣寒者未有不敗者也
又有毒氣沉伏或年高氣弱或服尅伐之劑氣益以
虛膿因不潰必假火力以成功如曹工部發背已十
八日瘡頭如粟瘡內如錐痛極時有悶瞽飲食不思
氣則愈虛以大艾隔蒜灸十餘壯尚不知內痛不減
遂明灸二十餘壯內痛悉去毒氣大發飲食漸進更
以大補藥及棗木燃灸瘡肉漸潰劉貫卿足患疔已
十一日氣弱亦灸五十餘壯更以托裏藥而愈黃君
腿癰膿清脉弱一婦臂結一塊已潰俱不收斂各灸
以豆豉餅更飲托裏藥而愈一男子胸腫一塊半載

不消令明灸百壯方潰與大補藥不歛復灸以附子餅而愈一男子患發背焮痛如灼以隔蒜灸三十餘壯腫痛悉退更以托裏消毒藥而愈一人患發背瘡頭甚多腫硬色紫不甚痛不腐潰以艾鋪患處灸之更以大補藥數日死肉脫去而愈陳工部張兵部患發背已四五日瘡頭雖小根畔頗大俱以隔蒜灸三十餘壯其根內消惟瘡頭作膿數日而愈余丙子年忽惡心大椎骨甚痒須臾臂不能舉神思甚倦此天疽危病也急隔蒜灸之痒愈盛又明灸五十餘壯痒遂止旬日而愈精要云灸法有回生之功信矣大凡

蒸灸若未潰則拔引鬱毒已潰者則補接陽氣祛散寒邪瘡口自合其功甚大嘗治四肢瘡瘍氣血不足者祇以前法灸之皆愈疔毒甚者尤宜灸痛則灸至不痛不痛則灸至痛亦無不愈若中虛者不灸而服敗毒藥則瘡毒未除中氣先傷未有不敗者也李氏云治疽之法著艾勝於用藥緣熱毒中隔外內不通不發泄則不散不幸患此者適處貧居僻一時無藥用灸尤便其法用大獨蒜切片如三錢厚貼於疽頂上以艾炷安於蒜片上灸之每三壯一易蒜片若灸時作痛要灸至不痛不痛要灸至痛方止大槩以

百壯為度用大蒜取其毒有力多用艾炷取其火力透如法灸之瘡一發膿潰繼以神異膏貼之不日而安一能使瘡不開大二內肉不壞三瘡口易合見效甚神丹溪云惟頭為諸陽所聚艾炷宜小而宜少凡治一切癰疽發背婦人妬癰皆可即用後法灸之無有不愈其法先令病人以肘凭几豎臂腕腰直用篾一條自臂腕中曲紋盡處男左女右貼肉量起直至中指尖盡處為則不量指甲却用竹杠一條令病人脫衣騎定令身正直前後用二人扛起令脚不着地又令二人扶定勿令僵仆却將所量臂腕篾從竹

杠坐處尾骶骨盡處直豎竹上貼脊背量至篾盡為則用墨點定此只是取中非灸穴也却用薄篾作則子量病人中指節相去兩橫紋為則男左女右截為一則就前所點記處兩邊各量開一則盡處即是灸穴兩穴各灸五壯或七壯不可多灸不問癰生何處並用此法灸之無不愈者一云可視其疽發於左則灸左發於右則灸右甚則左右皆灸蓋此二穴心脉所過處素問云諸瘡瘍皆屬於心又云營氣不從逆於肉理乃生癰腫又云心主血心氣滯則血不行故逆於肉理而生癰腫灸此穴使心火調暢血脉流通

即能奏效起死回生非常之力屢試屢驗矣灸圖見方後

八味丸治驗

張甫北京人年踰三十素怯弱不能食冷臂患一毒脉虛弱予以托裏藥治之而消但飲食少思或作脹或吞酸日漸羸瘦參苓等藥不應右尺脉弱此命門火衰不能生土遂以八味丸補土之原飲食漸進而愈予嘗病脾胃服補劑及針灸脾俞等穴不應幾殆吾鄉盧丹谷先生令予服八味丸飲食果進三料而平予凡年踰四十貌豐氣弱遇風則眩勞則口舌生

瘡胸常有痰目常赤濇又一人脾虛發腫皆以八味丸而愈王太僕舊患脾服此丸十八年而康黃銀臺患脾服此將驗而他醫阻之反用寒藥遂至不救蓋此丸用附子有功常驗人有不耐勞不能食冷或飲食作脹大便不實或口舌常破如瘡服涼藥愈盛或盜汗不止小便頻數腿腰無力或嚙津或呼吸覺冷氣入腹或陰囊濕痒或手足冷或面白或鰲黑或畏寒短氣以上諸症皆屬虛甚非用附子不可夫附子一物大辛熱除三焦痼冷六腑沉寒氣味勁悍有回陽之功命門火衰非此不補性雖有毒但炮製如法

或用甘草防風等同炒或童便久浸以去其毒復與地黃等味同用以制其熱潤其燥緩其急假其克捷之功而駕馭其慄悍之勢則雖久服亦有功而無害惟在善用之而已若執泥有毒果有沉寒痼冷之疾棄而不用其能療乎觀東垣八味丸論則較然矣

危證

郭職方名璉背瘡潰陷色赤舌卷予謂下陷色紫主陽氣脫舌卷囊縮肝氣絕遂辭之經曰舌卷囊縮此筋先死庚日篤辛日死果至立秋日而歿○一人腹患癰膿熟開遲脉微細膿出後瘡口微膿如蟹吐沫

此內潰透膜也予謂瘡瘍透膜十無一生雖以大補藥治之亦不能救此可為待膿自出之戒也○陸氏女初嫁患腰痛不腫脉沉滑神思倦怠此為內發七情之火飲食之毒所致以托裏藥一劑下瘀膿升許陳良甫云瘡疽未潰內陷面青唇黑者不治果歿○楊錦衣脚跟生毒如豆許痛甚狀似傷寒予謂獵人被兔咬脚跟成瘡淫蝕為終身之疾若人脚跟患瘡亦終不愈因名兔啣也遂以還少丹內塞散治之稍可次因納寵作痛反服攻毒藥致血氣愈弱腿膝痿軟而死蓋足跟乃二蹻發源之處腎經所由之地若瘡口不合則蹻氣不能發

生腎氣由此而泄故為終身之疾况彼瘡先得於虛復不知戒雖大補氣血猶恐不及安服攻毒暴悍藥以戕賊之乎○京師王大廣年踰六十素食厚味頰頤患毒未潰而肉先死脉數無力此胃經積毒所致然頰頤正屬胃經未潰肉死則胃氣虛極老人豈宜患此予辭不治果死內經云膏粱之變足生大疔受如持虛

一男子患背疽肉黑陷下請治予謂經云疽者沮也熱氣純盛下陷肌膚筋骨髓枯內連五臟故堅如牛領之皮此精氣已竭安用治果死

外科心法卷之四終